

दिनांक : 19.06.2026

समय : 18.45 बजे

- प्रधानमंत्री नरेन्द्र मोदी कह्यो-नौजवानां अर उद्योगां रे एके सागे आगे बढ़बा ऊँ नौकरी-धंधा रा मौका बणबा री गति बधेला।
- पीएम किसान सम्मान निधि री 23वीं किस्त काल जारी करी जावेला-9 करोड़ 44 लाख ऊँ बत्ता पात्र किसानां रा खाता मांय रकम भेजी जावेला।
- राज्य सरकार सरकारी कर्मचारियां रा तबादलां माथे रोक हटायी-थर्ड ग्रेड अध्यापकां रा अर चिकित्सा विभाग मांय तबादलां माथे रोक रहवेला।
- आर.पी.एस.सी. एसआई भर्ती-2025 री लिखित परीक्षा रो नतीजो जारी कीनो।

000

प्रधानमंत्री नरेन्द्र मोदी कह्यो है के वां रा राज मांय नौकरी-धंधा रा नुवां मौका बणावण सारू केई योजनावां चलायी ज्यी है अर व्यवस्था मांय जरूरी बदलाव करी ज्या है। प्रधानमंत्री पीएम विकसित भारत रोजगार योजना रा तैत आज करीब 2 हजार 400 करोड़ रुपया री रकम जारी कीनी। ई मौके श्री मोदी कह्यो के नौजवानां अर उद्योगां रे एके सागे आगे बढ़बा ऊँ नौकरी-धंधा रा मौका बधे है। श्री मोदी केन्द्र सरकार कानी ऊँ लारला दस साल मांय चलायी ज्यी न्यारी-न्यारी योजनावां रो जिक करता थकां कह्यो के अ योजनावां मोटी तादाद मांय नौकरी-धंधा रा मौका बणाया। प्रधानमंत्री कह्यो के आ योजना नौजवानां अर उद्योगां बीच मजबूत पुल रो काम कर रही है।

.....

वे नौजवानां सागे बातचीत ई कीनी। जयपुर, जोधपुर, उदयपुर, कोटा, अलवर, पाली अर भीलवाड़ा समेत आखा देश मांय 200 ठौड़ां क्षेत्रीय कार्यक्रम ई राख्यी ज्यी। जयपुर मांय व्ह्या राज्य स्तर रा कार्यक्रम मांय मुख्यमंत्री भजनलाल शर्मा ई शिरकत कीनी।

000

प्रधानमंत्री किसान सम्मान निधि री 23वीं किस्त काल जारी करी जावेला। ई रे जरिये 9 करोड़ 44 लाख ऊँ बत्ता पात्र किसानां रा खातां मांय 18 हजार 880 करोड़ रुपया ऊँ बत्ती रकम भेजी जावेला। प्रदेश रा न्यारा-न्यारां जिलां मांय ई ई कार्यक्रम सारू तैयारियां चाल रही है। पीएम किसान सम्मान निधि रा तैत किसानां ने हर साल दो-दो हजार रुपया री तीन किस्तां मांय कुल 6 हजार रुपया सालाना री माली मदद दी जावे है।

000

केंद्रीय गृह मंत्री अमित शाह कानूनी प्रक्रिया रा हर दौर मांय प्रौद्योगिकी ने असरदार तरीका ऊँ काम लेवण री जरूरत माथे ज़ोर दीनो है। वे आज नई दिल्ली मांय 26वां अखिल भारतीय फिंगरप्रिंट सम्मेलन-2026 मांय बोल रह्या हा। गृह मंत्री राष्ट्रीय स्वचालित फिंगरप्रिंट पहचान प्रणाली रो जिक करता थकां कह्यो के आपराधिक न्याय प्रणाली ने देश रा हर रहवासी ने संविधान मांय दिया ज्या हक हासिल करण रो उपयुक्त जरियो बणावण रो बगत आ ग्यो है। श्री शाह कह्यो के आ प्रणाली केई मुश्किल मामलां ने ई आसान बणावण मांय घणी मदद कीनी है। गृह मंत्री कह्यो के फिलहाल ई रा बूता रो केवल दस फीसदी ही काम लियो जा रह्यो है। श्री शाह कह्यो के आ प्रणाली अपराधियां री पिछाण करण मांय घणी असरदार है।

000

देश मांय ह्यूमन पैपिलोमा वायरस-एचपीवी ऊँ बचाव सारू तीन महीनां मांय करीब 50 लाख टीका लगा दिया ज्या है। स्वास्थ्य अर परिवार कल्याण मंत्रालय कानी ऊँ करी ज्या सोशल मीडिया पोस्ट रे मुजब मध्य प्रदेश अर गुजरात मांय सगळां रे ए टीका लगा दिया ज्या है।

000

21 जून ने मनाया जावण वाळा अंतर्राष्ट्रीय योग दिवस रा सिलसिला मांय आज विधानसभा परिसर मांय योग कार्यक्रम-योगोत्सव राख्यी ज्यो। विधानसभा अध्यक्ष वासुदेव देवनानी री अगुवाई मांय करी ज्या ई योगाभ्यास मांय विधायक, विधानसभा सचिवालय रा अहलकार अर कर्मचारी शामिल व्ह्या। ई मौके देवनानी कह्यो के योग स्वस्थ शरीर, संतुलित मन अर सकारात्मक जीवन रो नजरियो बतावे है। वे सगळा ऊँ योग ने रोजमर्रा रो हिस्सो बणावण री अरज कीनी।

.....

मुख्यमंत्री भजनलाल शर्मा ई आज वां रा रेहवास माथे विश्व योगासन चैंपियनशिप मांय तमगा जीतण वाळां सागे योगाभ्यास कीनो। ई सागे ई राज्य मांय चाल रह्या योग कार्याक्रमां रा तैत जयपुर रा राष्ट्रीय आयुर्वेद संस्थान परिसर मांय जुम्बा रैली निकाली ज्यी। ई पाछे संस्थान रा शिक्षकां अर विद्यार्थियां री ओर ऊँ हवामहल ताई योग रैली निकाली ज्यी। पाली मांय आयुर्वेद विभाग री ओर ऊँ सामूहिक योगाभ्यास करवायी ज्यो।

000

अंतर्राष्ट्रीय योग दिवस रे मौके भारतीय वायुसेना देश भर मांय योग सत्र राखेला। रक्षा मंत्रालय रे मुजब वायुसेना रा कर्मचारी वां रा पिरवारवाळा सागे योग सत्रां मांय शामिल व्हेला। वां सागे स्कूली बच्चा अर एनसीसी कैंडेट ई आखा देश मांय न्यारा-न्यारा वायुसेना टेशनां माथे राख्या जावण वाळा योग सत्रां मांय शिरकत करेला।

000

राज्य सरकार सरकारी अहलकारां अर कर्मचारियां रा तबादला माथे रोक फिलहाल हटा दीनी है। प्रशासनिक सुधार अर समन्वय विभाग री ओर ऊँ जारी हुकम रे मुजब पांच जुलाई ताई तबादला कर्या जा सकेला। हालांकि, शिक्षा विभाग रा थर्ड ग्रेड अध्यापकां रा तबादला फिलहाल नी कर्या जा सकेला। ई सागे ई चौमासा मांय बीमारियां रा पसारा री शंका ने ध्यान राखता थकां चिकित्सा विभाग मांय ई तबादला माथे रोक रहवेला। हुकम रे मुजब घणा मांदा कर्मचारियां अर लोग-लुगाई रा मामलां माथे खास ध्यान दियो जावेला।

000

केंद्रीय वाणिज्य अर उद्योग मंत्रालय मांय उद्योग अर आंतरिक व्यापार संवर्धन विभाग रा अतिरिक्त सचिव अतीश कुमार सिंह नवाचार अर उद्यमिता हलकां ऊँ जुड्या खास लोगां सागे आज जयपुर रा भामाशाह टेक्नो हब मांय बातचीत कीनी। ई दौरान राज्य मांय स्टार्टअप इकोसिस्टम रा विकास, मौकां अर चुनौतियां रा बारा मांय चर्चा करी ज्यी। कार्यक्रम मांय श्री सिंह "सरकार के 12 वर्ष और स्टार्टअप इंडिया पहल के 10 वर्ष" मुद्दा माथे चर्चा करता थकां कह्यो के राजस्थान नवाचार अर उद्यमिता ने बधावो देवण मांय खास काम कीनो है। वे स्टार्टअप इकोसिस्टम रो फायदो मोटा शहरां सागे दूर रा जिलां अर समुदायां ताई ई पूगावण माथे जोर दीनो।

कार्यक्रम पाछे खबरनवीसां सागे बातचीत करता थकां श्री सिंह कह्यो के प्रदेश मांय 8 हजार ऊँ बत्ता स्टार्टअप है अर नौजवान नुवी-नुवी जुगत लगा रह्या है। वे कह्यो के स्टार्टअप रा मामला मांय राजस्थान देश रा अगाडी राज्यां मांय शामिल है।

000

राजस्थान लोक सेवा आयोग आज एसआई भर्ती 2025 री लिखित परीक्षा रा नतीजा रो ऐलाण कर दीनो। आयोग रा सचिव रामनिवास मेहता बतायो के 20 हजार 798 उम्मीदवार शारीरिक दक्षता परीक्षा सारू पास करी ज्या। पास व्ह्या उम्मीदवारां ने शारीरिक दक्षता परीक्षा सारू जाणकारी दे दी जावेला। आं उम्मीदवारां री पात्रता संबंधी जांच इन्टरव्यू री बगत करी जावेला। ध्यानजोग है के 1 हजार 86 ओहदा माथे भर्ती सारू आ लिखित परीक्षा 5 अर 6 अप्रैल 2026 ने लीरीजी ही।

000

जयपुर पुलिस यातायात नियम तोड़बा वाळां रे खिलाफ निगराणी अर कार्रवाई और करडी कर दीनी है। शहर मांय 15 ठौड़ां लगायी ज्या 47 कैमरां रे जरिये वाहन चलावण वाळां माथे ऑनलाईन तरीका ऊँ निगराणी राखी जा रही है। यातायात पुलिस रा उपायुक्त योगेश गोयल बतायो के तेज गति ऊँ वाहन चलावण अर लालबत्ती पार करण वाळां रे खिलाफ लगातार ई-चालान जारी कर्या जा रह्या है।

000

राज्य मांय प्रोबेशन पीरियड वाळा सरकारी कर्मचारियां ने ई राज्य बीमा योजना रो फायदो दियो जावेला। बीमा अर प्रावधायी निधि विभाग कानी ऊँ मिली जाणकारी रे मुजब आं कर्मचारियां री तनखाह ऊँ ई राज्य बीमा प्रीमियम रा तौर ऊँ हर महीना 800 रुप्या री कटौती करी जावेला। आ व्यवस्था 1 अप्रैल, 2026 ऊँ लागू मानी जावेला।

000

रेलवे जोधपुर-चेन्नई बीचे हर सप्ताह खास रेलगाडी चलावण रो फैसलो कीनो है। उत्तर पश्चिम रेलवे रा मुख्य जनसंपर्क अधिकारी अमित सुदर्शन बतायो के आ गाडी 27 जून ऊँ 25 जुलाई ताई हर थावर ने जोधपुर ऊँ रवाना व्हे र सोमवार सिंज्यां चेन्नई पूगेला। वापसी मांय आ गाडी 30 जून ऊँ 28 जुलाई ताई हर मंगलवार ने चेन्नई ऊँ रवाना व्हे र गुरुवार ने जोधपुर पूगेला। आ गाडी जयपुर, सवाईमाधोपुर, भोपाल, नागपुर अर विजयवाड़ा समेत केई खास टेशनां माथे रूकेला।

000

राज्य मांय अब अनुसूचित जाति अर अन्य पिछड़ा वर्ग रा विद्यार्थियां सारू छात्रवृत्ति री योजनावां रा तैत अर्जी देती बगत निवास प्रमाण पत्र देवण री जरूरत नी रहवेला। सामाजिक न्याय अर अधिकारिता विभाग रे मुजब ई फैसलां रो मकसद विद्यार्थियां सारू अर्जी देवण री प्रक्रिया ने आसान बणावणो है। अनुसूचित जाति अर अन्य पिछड़ा वर्ग रा उम्मीदवारां सारू प्री-मैट्रिक अर पोस्ट-मैट्रिक छात्रवृत्ति योजनावां रो हर साल करीब एक करोड़ बीस लाख विद्यार्थियां ने फायदो मिले है। हाल ताई वजीफा सारू निवास प्रमाण पत्र जमा करावणो जरूरी हो।

000